



UKA2018/107

24/10-2018

Steen Lynge

Aningaasartuutit suulluunniit Inatsisartunit taakkulu allattoqarfianit aningaasartuutigineqartut kikkunit tamanit takuneqarsinnaanngornissaat pillugu taamatullu kikkut tamarmik paasiniaasinnaanngornissaat pillugu Inatsisartut Suleriaasiata allanngortinnissaanut Inatsisartut Siulittaasoqarfiat siunnersuuteqaqqullugu peqquneqarnissaanik Inatsisartut aalajangiiffigisassaattut siunnersuut
(Inatsisartunut ilaasortaq Niels Thomsen, Demokraatit)

(Siullermeernera)

Inatsisartunut ilaasortap Niels Thomsenip siunnersuutigaa, Inatsisartut taakkulu allattoqarfiat allatulli pisortat ingerlatsiviitut ammasuunissaannut piumasaqarfingineqarsinnaassasut aningaasartutit eqqarsaatigalugit.

Soorlu siunnersuuteqartup nammineq oqaatigigaa, Inatsisartut taakkulu allattoqarfiat pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaata ataaniinngillat. Taamaasillutik innuttaasut takusinnaanngilaat, Inatsisartut taakkulu allattoqarfiani aningaasat, Inatsisartunit akuersissutigineqartartut, qanoq sumullu atorneqarnersut. Paarlattuanik innuttaasut tusagassaqartitsiviillu allattugaatinut malinnaasinnaatitaapput, kommunini Namminersorlutik Oqartussanilu pisortat allattoqarfii allat pineqartillugit.

Taamaasilluni qinikkat ikittuinnaat, Inatsisartut allattoqarfiata aningaasaqarnera malinnaavigissallugu periarfissaqarput taamaasillutillu paassisutissinneqarsinnaallutik qanoq Inatsisartuni pingaarnersiusoqartarnersoq. Innuttaasunut tamanna ataqqinninnerunngilaq - innuttaasut tamarmik inatsisartut ingerlanneqarnerat pillugu paassisutissinneqarsinnaasariaqarput.

Innuttaasut ataasiakkaat kikkut tamat oqartussaaqataanerata aqqani pisinnaatitaaffii illorsorneqassappata pitsaanerpaamik, taava pingaaruteqarpoq innuttaasut sunilluunniit paasitinneqarsinnaatitaanissaat Inatsisartut taakkulu sulinerat pillugu. Taamaasilluni qularnaarneqassaaq innuttaasut qinikkatullu tunngavissaqarnissaat isummerfigissallugit Inatsisartut sulinerat amma pingaarnersiusarnerat.



Taamaattumik piumasaqataasariaarutissaaq Inatsisartunut qinigaasimanissaq, Inatsisartut taakkulu allattoqarfii pillugit paasisaqarniaraanni.

Innuttaasut qinikkatullu pisinnaatitaaffeqartariaqarput paassisutissat pinissaannut.

Allaanerusariaqanngilaq.

Demokraatini siunnersuut tapersorsorparput siunnersuullu ingerlateqqillugu Inatsisartut

Siulittaasoqarfianut suliareqqitassanngorlugu.